



partii naleraq

UKA 2016/081-01

07-10-2016

Inatsisartut aalajangiiffigisassaattut siunnersuutigineqarpoq, Naalakkersuisut peqquneqassasut danskit oqartussa qarfiinut attaveqassasut Aalborg-imi Grønlandshavn-imiit Kalaallit Nunaannut umiarsuakkut nassiussassat tamarmik hash-itaqannginersut akitsuuserisunit misissorneqartarnissaat qulakkeerumallugu aalajangersimasumik Grønlandshavn-imi akitsuuserisoqartitsilersinnaanerup siunnerfigineqarnissaa.

(Inatsisartunut ilaasortaq Steen Lyngé, Atassut)

Inatsisartunut ilaasortaq Steen Lyngé, Atassut , Inatsisartut aalajangiiffigisassaattut siunnersuuteqarpoq, Naalakkersuisut peqquneqassasut danskit oqartussa qarfiinut attaveqassasut Aalborg-imi Grønlandshavn-imiit Kalaallit Nunaannut umiarsuakkut nassiussassat tamarmik hash-itaqannginersut akitsuuserisunit misissorneqartarnissaat qulakkeerumallugu aalajangersimasumik Grønlandshavn-imi akitsuuserisoqartitsilersinnaanerup siunnerfigineqarnissaa pillugu taannalu Partii Naleraq sinnerlugu imannak oqaaseqarfigissuarput:

Aallaqqaasiullugu erseqqissassuarput Partii Naleqqami ikiaroorartumik Nunatsinnut eqqussuineq tuniniaanerlu akuerinngilluinnaratsigit.

Taamaammatt ikiaroorartumik akiuniarnermut suliniutit suliniutaasinnaasullu tamaasa tunngaviatigut tapersorsorpavut.

Una siunnersuut piviusinngortinneqassappat, soorunami aningaasatigut sulisoqarnikkullu inuiaqatigiinnut kingunerisinnaasaasa sukumiisumik nalilersorneqarnissaat pisariaqarpoq.

Maannakkut naluneqanngitsutut Nuummi umiarsualivissarsuaq suliarineqaruttulerpoq, taamaattumik uagut isumarput naapertorlugu Aalborgimi umiarsualivik kisiat aallaavigissallugu naammangittoq, minnerunngitsumik nunatta siunissami naalagaaffinngornissaanut suliniarnermut naapertuutinngimmat.

Uanimi siunnersuummi aningaasarpasuit million koruunit arlallit sulisussallu arlallit danmarkimi pilersinneqartussat pineqarput. Naak maani nunatsinni suliffissanik pilersitsiniarluta oqalukkaluartugut.

Taamaattumik uagut orniginarnerutipparput, suliniummut suliffissanullu pilersinneqartussamut siunnersuut Aalborgimi pilersinniarneqarani Nuummi pilersinneqartariaqartoq, taamaaliornikkut suliffissat nutaat pilersinneqaannaratik, kisianni aamma aningaasaliissutit nunatsinniiginnarnissaat qulakkeerneqassammat.

Kangerlussuarmi aaliangersimasumik ilanngaaserisumik ikiaroonartunik ujarlernermi qimmilimmik atorfinitsitsisoqarsimanera nuannaarutingaarput, neriuppugut taassuma politiillu suleqatigiilluarnermikkut angusaqarluarumaartut.

Aappaatigulli uggoraarput timimik qinnguartaat atorlugu (bodyscanner) misissuisinnaanerit suli piviusunnigortinneqarsimannngimmata. Taamaammat Naalackersuisunut apeqqutigissuarput timimik qinnguartaat atorlugu (bodyscanner) misissuisalernisaq qaqugu atorneqalernissaa naatsorsuutigineqarnersoq ?

Ilisimaneqarpoq ikiaroonartumik nunatsinnut eqqussuisartut, paasineqannginnissaq anguniarlugu periutsinik assigiinngitsorpasuarunik nassaarsiortuartut, qularnanngitsumillu aamma taamaaliornissamut pikkorissingaluttuinnartut.

Aamma isumaqarpugut aasaanerani tingerlaataannallit nakkutigineqaratik nunatsinni angallatorujussuannigortut nakkutigeqqissaartariaqalersut.

Kiisalu aamma kilisaatit angallatillu allat nunatsinniik danmarkimut nunanullu allanut suliaritikkiartortartut misissuiffigineqartarnissaat piumasarineqartariaqartoq isumaqarpugut.

Taamaattumik nakkutilliinermi atorneqarsinnaasut tamaasa atorlugit aamma ikiortigineqarsinnaasut suulluunniit atorlugit ikiaroonartumik eqqussuinerit sapinngisamik pitsaanerpaamik akiorniarneqarnissaa tamaviaaruttariaqarparput.

Isumaqarpugullu Naalackersuisut danskit naalackersuisuinut saaffiginnittariaqartut, nunatsinni politiit ikiaroonartulerinermik suliaqartartut Nuummiinnaangitsoq, kisianni aamma sinerissap sinnerani pitsaanerusunik periarfissarsiuuteqqullugit.

Tassami naluneqanngilaq, politiit ullumikkut suliassarpassuaqareerput. Taamaammatt politiinik ikiaroorartulerinermik annertunerusumik suliaqarsinnaasunik peqartariaqarnera piumasaqaatigisariaqaripput isumaqarpugut.

Taama naatsumik oqaaseqarluta suliap aappassanneerqannginnerani akileraartarnermut ataatsimiititaliami suliarineqarnissaa inassutingaarput.